

Na osnovu člana 162. Pravila Univerziteta u Sarajevu, a u vezi sa članom 36. Pravilnika o radu Sekretarijata Univerziteta u Sarajevu, članom 14. Pravilnika o plaćama i drugim materijalnim pravima zaposlenika Sekretarijata Univerziteta u Sarajevu i članom 13. i 14. Uredbe o naknadama i drugim materijalnim pravima koja nemaju karakter plaće („Službene novine FBiH“, broj: 34/04, 56/04, 68/05, 33/06 i 75/07), Upravni odbor Univerziteta u Sarajevu je, na 28. sjednici održanoj 21.04.2009. godine, d o n i o

P R A V I L N I K
o utvrđivanju kriterija za dodjelu naknada zaposlenicima Univerziteta u Sarajevu za slučaj smrti, teške invalidnosti ili teške bolesti zaposlenika ili člana njegove uže porodice

Član 1.

Ovim pravilnikom utvrđuju se kriteriji za dodjelu naknada zaposlenicima Univerziteta u Sarajevu za slučaj smrti, teške invalidnosti ili teške bolesti zaposlenika ili člana njegove uže porodice.

Naknada za slučaj smrti

Član 2.

U slučaju smrti zaposlenika ili člana njegove uže porodice isplaćuju se troškovi sahrane u iznosu od najviše četiri prosječne mjesečne plaće isplaćene u Federaciji za prethodna četiri mjeseca prije donošenja rješenja o isplati te naknade.

Naknada za slučaj smrti iz stava 1. ovog člana isplaćuje se članovima uže porodice iz člana 4. tačka 1), 2) i 3) bez obzira da li su članovi uže porodice živjeli u zajedničkom domaćinstvu s zaposlenikom.

Naknada za slučaj teške invalidnosti ili teške bolesti

Član 3.

U slučaju nastanka teške invalidnosti ili teške bolesti zaposlenika, ili člana njegove uže porodice, u skladu sa raspoloživim sredstvima, može se isplatiti jednokratna novčana pomoć u visini njegove 3 (tri) plaće isplaćene u prethodna tri mjeseca ili 3 (tri) prosječne mjesečne plaće isplaćene u Federaciji, ako je to za njega povoljnije.

Zaposleniku se može, u skladu sa raspoloživim sredstvima i na osnovu saglasnosti rektora Univerziteta, isplatiti dio ili ukupni troškovi liječenja teške invalidnosti ili teške bolesti u zdravstvenoj ustanovi u kojoj je on platio troškove tog liječenja. Troškovi liječenja se isplaćuju na osnovu fakture ili računa zdravstvenih ustanova u kojima je liječenje obavljeno.

Pod teškom bolešću iz stava 1. i 2. ovog pravilnika, prema Uredbi o naknadama i drugim materijalnim pravima koja nemaju karakter plaća, podrazumijevaju se slijedeće bolesti: akutna tuberkuloza, maligna oboljenja, endemska nefropatija, hirurška intervencija na srcu i mozgu, sve vrste degenerativnih oboljenja centralnog nervnog sistema, infarkt (srčani i moždani), oboljenje mišičnog sistema, paraliza i druge teške bolesti određene Naredbom

Federalnog ministarstva zdravstva o listi teških bolesti, odnosno teških tjelesnih povreda na osnovu kojih se ostvaruje naknada za slučaj teške invalidnosti ili teške bolesti („Sl. novine F BiH” broj: 30/05) kao i teške tjelesne povrede. Bolest, odnosno teška povreda se dokazuje na osnovu dijagnoze zdravstvene ustanove.

Pravo na jednokratnu novčanu pomoć iz stava 1. ovog člana, po osnovu teške invalidnosti ostvaruje se za utvrđeni stepen invalidnosti od najmanje 60%.

Jednokratna novčana pomoć iz stava 1. ovog člana, može se dodijeliti i zaposleniku, koji je operisan od bolesti koje nisu obuhvaćene odredbom stava 3. ovog člana, ukoliko je takva operacija izvršena iz zdravstvenih razloga i po preporuci ljekara.

Prioritet u odobravanju novčane pomoći iz stava 1. ovog člana, imaju zaposlenici u odnosu na članove njihove uže porodice.

Član 4.

Pod članom uže porodice iz člana 3. ovog pravilnika, podrazumijevaju se slijedeći članovi porodice zaposlenika i to:

- 1) suprug(a) u braku ili van braka, ako žive u zajedničkom domaćinstvu;
- 2) djeca rođena u braku, van braka, zakonito usvojena ili pastorčad do 18, odnosno 26 godina starosti, ako se nalaze na redovnom školovanju i nisu u radnom odnosu, a djeca nesposobna za rad, bez obzira na starosnu dob, ako žive u zajedničkom domaćinstvu;
- 3) roditelji (otac, majka, očuh, maćeha i posvojitelji), ako žive u zajedničkom domaćinstvu sa zaposlenikom;
- 4) braća i sestre bez roditelja do 18, odnosno 26 godina starosti, ako se nalaze na redovnom školovanju i nemaju drugih prihoda, već ih korisnik naknade stvarno izdržava ili je obaveza njihovog izdržavanja zakonom utvrđena, a ako su nesposobni za rad, bez obzira na starosnu dob, pod uslovom da sa njima živi u zajedničkom domaćinstvu;
- 5) unučad pod uslovima iz tačke 2. ovog člana, ako nemaju roditelje i žive u zajedničkom domaćinstvu sa korisnikom naknade.

Član 5.

Ovaj pravilnik stupa na snagu danom donošenja.

**PREDSJEDNIK
UPRAVNOG ODBORA**

Prof. dr. Sead Redžepagić

Broj: 02-34-516-1/09
Sarajevo, 21.04.2009. godine

